

Andres Hernandez di San Nicolas Business Association:

‘Nos ta akinan pa yuda tur comerciante pariba di brug’



SAN NICOLAS – Dia-mars atardi, durante un conferencia di prensa di San Nicolas Business Association, a keda conoci cu ayera anochi nan a organisa e ‘Community Gathering’ unda a informa tocante e resultadonan di e 1st San Nicolas Business Summit.

Andres Hernandez, presidente di asociacion, a comenta cu esaki a tuma luga na Santa Teresita Center di San Nicolas y nan a trece dilanti informacion tocante e cumbre cu a tuma luga tres luna pasa y su resultadonan.

El a bisa cu Community Gathering tabatin un caminda basta largo, cu ainda nan ta riba dje y nan tin caba e resultadonan. No solamente planan cu tin pa proyecto, sino cu e idea ta pa tin proyectonan cu por cuminsa den seis luna.

Di mesun manera, Hernandez a expresa cu tabatin e presentacion di proyectonan cu lo cuminsa den momentonan aki. Tambe a trece dilanti loke ta trata e Hotel Secrets di Baby Beach y tambe proyectonan cu ta referi pa plantacion di cannabis medicinal. Tocante algun comercian-

tenan cu kier participa den e prome cumbre, pero cu nan no a haya chens, Hernandez a manifesta cu tabata dificil pa tur hende haya luga. Nan a pone publicamente cu si algun persona tabatin un proyecto cu ta cla, e por cuminsa den e proximo seis luna loke ta trata na San Nicolas of pariba di brug, esey tabata su oportunidad. Tambe a señala cu nan no por controla si un persona tabata laat cu esey. E punto ta cu esey tabata e prome cumbre, manera Hernandez a expresa, y despues di esey lo tin ‘follow up’ den cual por haci riba cualkier otro proyecto. “Nos ta akinan

pa yuda, tur persona, tur comerciante cu tin e interes pa traha algo pariba di brug”, el a sigura.

Di mesun manera, el a referi specialmente pa hende no presenta plan of ideanan. Mester presenta cu hecho, cu cosnan concreto cu por cuminsa move di biaha y por yuda otro. Tambe el a bisa cu un di e resultadonan di e prome cumbre ta cu a logra e prome Consejo di Minister den historia di Aruba cu a celebra dinan pas na San Nicolas. Tocante esaki, Hernandez a trece dilanti cu ta un luz pa nan, y esey lo bira mas grandi

unicamente ora cu pueblo ta bon informa y cu pueblo ta para su tras. Ministernan a tende di e prome seis proyecto cu tabata andando. Durante e reunion aki, e ministernan a facilita y asina por a yuda e comerciantenan en cuestion pa realisa e proyecto y pa agilisa e desaroyo economico pariba di brug.

Relaciona cu esaki, el a comenta cu e comerciantenan a puntra y ministernan a tuma nota. Tur comerciante a presenta proyectonan concreto, cosnan cu por wordo resolvi hopi lihe y tabata hopi fructifero e reunion ey.

‘Propietarionan di bar ta di acuerdo pa traha hunto pa un miho San Nicolas’

SAN NICOLAS – San Nicolas ta un parti di Aruba cu ta hala atencion pa varios motibo. Un di nan ta su beachnan, naturalesa y cayanen yen di color. Tambe ta hala atencion di turista of mesun ciudadanonan cu ta yega na e famoso cayanen di bar cu muhenan stranhero para pafo, cu algun biaha, no ta muestra bon pa algun of otro turista.

Ayera, durante un conferencia di prensa di San Nicolas Business Association, Bon Dia Aruba a puntra con e situacion di e barnan lo keda den tur e movecion economico cu lo tuma luga na San Nicolas den proximo lunanan, y con nan lo bay traha pa esaki no afecta turismo.

Hernandez a expresa cu e asociacion tin contacto cu comerciante di e barnan y ta wardando diferente cos pa



bin cu algo mas concreto. E prome tema cu nan a combersa ta cu mester busca un parti unda cu e turistanan

of ciudadanonan cu ta transita den e caya ta sinti nan un ‘tiki mas sigur’. Esaki ta un sistema cu ta wordo

traha, pero e mesun comerciantenan di e barnan ta di acuerdo cu nan mester yega na un consenso pa por convivi cu otro.

“E sistema t’ey. Loke nos mester wak ta con nos sistematiza esey te ora bin un solucion pa comercio cu semper a existi pa riba di brug”, Hernandez a señala.

El a trece dilanti cu mester busca un alternativa, pero asina mes el a bisa cu nan tin varios idea, pero te ainda no ta algo cla. E propietarionan di bar ta di acuerdo cu asociacion cu nan mester traha hunto pa yega na un miho San Nicolas.

Tocante si e proyecto di remodelacion di caya principal tambe ta inclui e area di barnan, Hernandez a comenta cu esey ta forma parti di e di dos fase, cu ta bay ta te na final di caya y di tres fase ta cayanen alterno.